

C) Mjena zwonka Łužicow.

W tutom dźěle sym po němskem alfabeće zestajał najznaćiše mjena powšitkowneho zemjepisa tak daloko, hač maju pola nas Serbow swoje samsne twórby, a k tomu wosebje serbske mjena ze stron Pruskeje, Sakskeje a Durinskeje, kotrež kraje běchu něhdy wot Serbow wobsydlene. W tychle krajinach pak je cyła syła městnych mjenow, kiž su hižo we swojej poněmčenej twórbje pak cyle pak nimale jenajke z poněmčonymi mjenami we Łužicomaj, z čehož so z wěstosću sudžić hodži, zo běchu w serbšćinje z woprědka jenajke, na př. Biehla (Bülau), Binnewitz, Brösen, Gabel, Gablonz, Groitzsch (Roitzsch), Laas, Lappa, Olsig, Thräna, Treben, Tschorna atd. Za tajke a podobne mjena smědža naši spisowaćeljo bjeze wšeho wobmyslenja wotpowědujce serbske twórby trjebać, kajkež so we wotdžělomaj B) a A) namakaju: Běla, Bónjecy, Brězyna, Jabłoń, Jabłońc, Hrodžišćo, Łaz, Łupa, Wólšinka, Drěnow, Trjebin, Čorna atd. Tohorunja dyrbja so za němske sydlišća wonych a druhich stron serbske pomjenowanja, kajkež mamy za te samsne němske městne mjena hišće džensa we Łužicomaj, porjadnje nałożować, na př. za Baiersdorf, Bergen, Hennersdorf, Grüntal, Kunnersdorf, Neudorf (Neuendorf, Naundorf), Paulsdorf, Reichenbach, Seifersdorf, Taubenheim, Weickersdorf atd. hižo w zašlych lětstotkach zeserbšćene pomjenowanja Bejerecy, Hory, Hendrichecy, Zeleny Doł, Kundraćicy, Pawłocy, Rychbach, Šiborćicy, Hołbin, Wókranćicy atd.

W slědujcem zapisku njejsym zwjetša ani přěnše ani posledniše tajkich mjenow wosebje mjenował.